

Waspada lonjakan jangkitan berpunca subvarian Omicron

Rakyat diminta tidak leka berikutan virus pantas merebak

Oleh Latifah Arifin

latifah@bh.com.my

Kuala Lumpur: Penularan pantas subvarian Omicron BA.4 dan BA.5 yang dikesan di negara ini bulan lalu berupaya mencetuskan situasi lebih buruk dengan kebimbangan peningkatan ketara kes harian COVID-19 dalam negara.

Timbalan Menteri Kesihatan 1, Datuk Dr Noor Azmi Ghazali, berkata dengan lonjakan kes harian semasa rakyat patut lebih berwaspada dan sentiasa mengambil langkah berjaga-jaga.

“Kita harap rakyat tidak leka dengan prosedur operasi standard (SOP), kebimbangan ketika ini adalah subvarian BA.4 dan BA.5 yang hadir ke negara ini dan transmisinya cepat menular, jadi semua jagalah SOP.

“Beberapa hari lalu, angka kes meningkat daripada 3,000, kepada 4,000 hingga 5,000 kes (sekarang), malah berlaku peningkatan kepada kes dirujuk ke hospital dari Pusat Penilaian COVID-19 (CAC) ke Pusat Rawatan COVID-19 Berisiko Rendah (PKRC), pesakit ke unit rawatan rapi (ICU) dan yang memerlukan alat bantuan pernafasan,” katanya.

Beliau berkata demikian ketika merasmikan Kongres Duitahunan Persatuan Pakar Bedah Endoskopik dan Laparoskopik Malaysia (SELSMA) di Pusat Kon-

vensyen Kuala Lumpur (KLCC), di sini, semalam.

KKM siap siaga

Awal bulan lalu, Menteri Kesihatan, Khairy Jamaluddin, mengesahkan kes pertama penularan subvarian Omicron iaitu dua kes varian BA.5 dan satu jangkitan BA.4.

Dr Noor Azmi berkata, nilai kadar kebolehjangkitan (Rt) negara turut menyumbang kepada kebimbangan itu dengan angka yang direkodkan adalah 1.12 bagi minggu epidemiologi (ME) ke-29.

Namun, katanya, Kementerian Kesihatan (KKM) tidak bercadang melaksanakan sekatan bagi memperketatkan kawalan kesihatan dan pencegahan COVID-19, sebaliknya bersiap siaga dalam aspek

pengurusan kesihatan awam.

“Setakat ini kita masih mengekalkan SOP dikeluarkan ketika peralihan ke fasa endemik lalu dan tak akan kuatkuasakan sekatan yang pernah dibuat dulu.

“KKM sentiasa bersiap sedia, contohnya di pintu masuk antarabangsa, saringan pemeriksaan diperketatkan lagi,” katanya memberitahu persediaan turut dibuat dengan memastikan fasiliti kesihatan awam berada tahap terbaik dari segi pengurusan hospital, makmal dan kemudahan perubatan lain.

Beliau turut menyeru masyarakat khususnya yang mempunyai penyakit kronik supaya segera mengambil dos penggalak kedua sebagai perlindungan.

“KKM sediakan dos penggalak kedua yang patut ambil mereka berusia 50 tahun ke atas dan ada penyakit kronik atau 18 hingga 69 tahun yang ada penyakit komorbid atau penyakit berkaitan imun,” katanya.



Dr Noor Azmi Ghazali